



En l'absence de Moÿse Aaron fonde le veau d'or, des oreillettes des femmes ; & le peuple l'adore.

URDANT Moÿse sur le Mont Sinaï, les Israélites s'ennuyèrent de sa longue absence, disans à Aaron, Fais-nous des Dieux qui marchent deuant nous : car quant à Moÿse qui nous a tirez d'Egypte, nous ne sçauons qu'il est deuenue. Aaron leur obtemperant dist, Donnez les oreillettes de vos femmes, vos fils & vos filles. Les ayant receuës, il forma en fonte le veau d'or : le peuple le voyant dist, Iceux sont tes Dieux, ô Israël, qui t'ont fait monter hors d'Egypte. Ce que voyant Aaron, edifia vn Autel deuant iceluy, & fit annoncer par vn Heraut, Demain est la solemnité au Seigneur. Et se leuans au matin offrirent oblation pacifique ; puis le peuple s'assit pour manger & boire, & se leuerent pour iouïr. Adonc le Seigneur parla à Moÿse, disant, Va à ton peuple qui a peché, ils se sont fouruoyez du chemin que tu leur auois enseigné, & ont fait vn veau de fonte qu'ils ont adoré, luy immolans bestes en sacrifice, & ont dit, Voicy tes Dieux, ô Israël, qui t'ont fait monter d'Egypte. Derechef le Seigneur dist à Moÿse, Ce peuple est rebelle, laisse moy, & ma fureur s'embrasera sur eux pour les exterminer.